

سجادة الروح

سمير الفيل



الهيئة العامة لقصور الثقافة
إقليم شرق الدلتا الثقافي

رئيس مجلس الإدارة
عثمان فؤاد برعي
رئيس إقليم شرق الدلتا

نائب رئيس مجلس الإدارة
والمشرق العام
إسماعيل حسن سالم

المراسلات : إقليم شرق الدلتا
الثقافي - المكتب الفني
تلفاكس : ٠٥٠ / ٣١٤٧٥٧

إهداء
إلى الموت
خلاني أعيد ترتيب أوراقى
لأنى زى كل المصريين
اللى يحبوا الحياة .
بالصمت والخفاء !
سمير الفيل

عزّمة

- * اللوري ٤٨
- * تراب الفلوس
- * كلام عن الاحتضار
- * خدوش
- * الدروب
- * البقية في حياتي
- * الداء
- * سهاري ، وصوابها الفتيل
- * كان الوجع لبلاب

طرف الهوا عيني
دمعت واتهزيت
جسدى بيتطوح
لكنها قلبى رسوخ الجبل
الهزة دي من سكة امبارح
وأنا اللي كل مشاعري
زي الحجارة الديش
فى أعلى التلال
رزقي حلال
إنما فيه رعشة مسكاني
وسكة جديدة وخداني
مش عارف أحط القدم
لكنما ماشى
الخطوة ضباشى
منخل بابص من وراه ، واضحك
منخل من السلك الحرير ، ومربعات ضيقة

بانظر فى قلب مرايتي .. توريني
واحدة من أياهم بتفتح قلبى
.. وتمضغ اللحم الطرى يشويش
نى ، لكن لسه تمضغه ف لذة
ما كنتش هزة
ما كنتش غير صورة مضببة للحلم
واقف علي سفح من الخضرة
وفوقي أكوام من كراسات
مطرة بتنزل ، واغربة
.. باهشها بإيدي
عمري ما حطيت الخواتم
مين حطها بالماظ
وكأنها ألفاظ بتبرق ، وتغويني
(علوش) واقف علي راسي يصحيني
ماسك منشة
بيبعد الكوابيس ، وبيأخذ الأحلام
أنا من ١٠/٣ حالف ما عدت هانام
يمكن أغمض عين ، وافتح الثانية
واحسب جميع اللي باقي ف عمري بالثانية

ما يهمنيش عيني اللي مطروفة
ولا لوري عدي علي صدري عشر مرات
مرة ، صرخت وقلت دي كوابيس
والثانية كسر الفوانيس
والثالثة فتح شراييني هويس
والرابعة كانت صورة مهزوزة
والخامسة شفت بنفسى بملابس العريس
والسادسة وردة علي صدري بتفتح
ويطلع من قلبها كلبين
والسابعة طقيت من القلب وبكيت
وحدي حزين
والثامنة خطفني (رُخ) لعين
والتاسعة رماني نفس الرخ علي صخرة ألم
.. نزفت حنين
والعاشرة قمت ، وصرخت ، ونمت ..
.. وتحت راسي مخدتين
عشر مرات
.. يفوت اللوري من فوقني
لحد جسمي ما استوي والأرض

فبقيت برق ورقة البفرة
لحم ، وعضام ، ودم ، وأفكار
معقول أخش النار في حلم
وأخرج خلصة ع الجنة
قمت لقيت إيديه منقوشة بالحنة
فوق رأسى (علوش) ^(١) نفسه
لكن رفيع زي صاحبنا (محمد الغندور) ^(٢)
اللى سحب نفسه من الوطن
للكويت

ولسه بيجهاز فلوس يرجع ويبني البيت
لسه ، ولسه ، و كله بينتظر بكرة
والفكرة قطر بضاعة
ماشى من سكات يبكي
تهمس حوالبه الغيطان
اللى زمان كانت بتحاوطه ، تستناه
لو تقدر أنك تنطق الآه
تطلع عنين الجن
كنت الشاعر الأصلي
اللى بلا تماحيك ولا طلاس

الليل ده كان حاسم
فى دخوله ، وخروجه
هل يعقل الفنان يحب بنت عمرها عشرين
بنت خدودها ورد جورى
بيقطفه البستان
هل يمكن أن الجملة تكون
.. بلا مبتدأ أو خبر ؟
بلا فعل أو فاعل ؟
ممكن جميع البلاغة تخلع هدومها
وتتأخر
محتاج أعيد ترتيب حروفي م الأول
اللورى عاد ودهسنى من تانى
خريت أغاني ، وبكا ، وجروح
.. وقلت يا رب
السهل فين ؟ كل ما شفته صعب ؟!

* * *

محمد علوش : شاعر مصري هجر القصيدة .
محمد غندور : شاعر عامية يعيش فى الكويت منذ فترة طويلة .

تراب الفلوس

خبط في جنبى السؤال
المجد للجميل
وصحيفة الأحوال
وللمخبر ماعدشى بيستخبي
.. فى جرناله
ولا يمشى ورا شاعر
من قهوته لبيته
الفن كلمنى
(نادانى لبيته)
هز فى وشى النص
هربت فى أوراقى
آدي المدينة بتستحمى فى غبارها
بعد آدان العشا
تستر فى أسرارها
وأنا وحيد
وإن كان حوالية الصحاب أفواج

البحر من غير سمك
.. ما فيهمش غير أمواج
لسه صهيلها ، يرج جلسة العشاق
يا كلوا الدرة مشوى
والحب لسه نى
الاحتشام الحى
خبى نفسه فى قبل صريحة ، مخطوفة
وأولاد تومرجى فقير
عاشين فى حبوبة
تحت السرير برشام
وحقن مصدبة
واقفة قصاد المراية
بقميص من الشفاف
وازاي أخاف
ألمس بإيدي المطر والأسئلة والجسد
ده أنا عشت أخاف الموت
عشت أخاف م الممكن
وانشرح م المحال
خبط فى جنبى السؤال

وانا راكب الأتوبيس
شريط من الخضرة يبيلع الركاب
والكاب
مطرز بخيط ذهبي ولامع
يا مصر يا حنينه
زي قلب الخصّة
كل حكاياتك فواجع
والناس أهي بتتسى
من دخلة الهكسوس ديارك
لدبة رجل آخر واحد م الفرنجة
من الشادوف القديم علي ترعتك
لصندوق أجنبي مرصوص بـ " رنجة "
سمك أصفر ، ومصبوغ زعفران
حكامك الطيبين
مهيّبين
مع فلول الرعايا
لكل خنجر أترشق في الضهر احتمال
ولكل شهقة ألم حكمة ، ونهاية
أتوبيس علي السكة بلا فرامل

ورا السواق
بيرتجف سلطان مملوكى
.. ورث الجوارى والعبيد
.. وبلدنا بالكامل
أول ما دخل الفرنجة
شمع الفتلة
وآدى أسوارنا المنيعه مفضوحة
ع الساحة خلق كثير من القتلى
وطاقتنا مفتوحة
..

خبط فى جنبى السؤال
اللى خبيته عن أولادى
خبيته عن نفسى
وفضلت أطارى ضل أبطالى
على الحيطان جرائيت
وفى اهتزاز أوتار الربابة
الداية تدخل باب خشب
وتهز سقطة حديد
بتغيب ساعة إلا ربع

وتخرج بالبسمة والبسمة
وراس عيل جديد
ماشى الأتوبيس لساه
بدون فرملة وجواه الجواري والعبيد
وأنا باتخبط وحيد
فى تواريخى
خاصمتكم يا مشايخ الجبة والقفطان
وخاصمت صمتكم
وسكوتكوا ع الطغيان
بتنكروا الجنوة
وتفضحوا الدخان
..

فرحنى طغيان النيل ع الضفاف
وجرحنى منظر طفل مكسور القلب
ماشى بلا أب ، أو أفراح
تايه مابين الحلم ، والحاضر المسخوط
" إيزيس " بتفتح تابوت
منه بتخرج جسد متفكك الأوصال
للشمس بتبص ، يرمش جفنها المكحول

ومنين أجيب ناس تكمل القصة
دي البصة دبحانى
لأن فيها اتهام مهول

..

يا أنامل البنت يا رقيقة
يكفيني منك طرزي إسمى
علي طرف شالك حقيقة
يا أنامل البنت الطرية
طرزي المنديل بخيط قصب ملكى
وم تدهوش لى

..

البيت ده كان ملكي
باعوه زمان ، وبتراب الفلوس
فطلع حفيدي
يتهمني بالتفريط
وملح ملفوف فى ورق الكراسات
طلع ونزل درجة ورا درجة
والأسئلة عرجة
لكنها بتحجل وتجرحنى

بتغربل الأحزان ، وترمى الحصى
فى وجه العائلة المخلصة
فى هروبها م الشرق ، لزمام الناحية الغربى
مين قبلى
داسه الخرافة ، ونجا
مين بعدى ضاعت منه أوراقه ، وعاد
" إرم ذات العماد "
يا صخرة منحوت بالعبودية
وعبقريّة الابتعاد
ما عداد مكان للتخفى
واقف اعدى النفس من خوفها
وتاريخى من زيفه
والنسر طائر مخاصم كل مين ع الأرض
فسيبونى على كيفى
وسيبيوه على كيفه

١٩٩٨/١١/٢٠

كلام عن الاحتضار

(١)

حجرين معسل وانطرح ع الأرض
حجرين ، وأصلى وأصوم
وأدخل في نفس اليوم
جنة الدراويش !
فما تسرقوش الشعر من قلبي
ما تبعثروش فرحكم عي عتبة الحواديت
نفسى أشوفكم تصحوا
صحوة التوت
علي فروعه
وتسحبوا القتلى حين ما تعودوا
دبابيس بتشبك قلبي في الفوانيس
ابص مهما ابص
تختفى الجدات
وتخرج م الشقوق حزم الحنان
اللى ببلاش

طلعت قلبي معاش
واديبي باملا الاستمارة في الخلا
والبرد بيميل علي قلبي

(٢)

نبتت طحالب
والموج ببيعت مراكب
يهبط منها قرصان
بعين واحدة ، وخنجره مسنون
قربت منى السكك الضلمة
والمنون
خايف أكون
باتجرع الخيبة
وأفك قماش الخيمة
وارجع افردھا
واق أوتادھا ف ضميرى
نبتت طحالب
والمية بدل ما تروينى
بتكوينى
واديبي متمدد علي ارضفتكم

ليه تكرهونى .. ياللى حبيتكم
وجيتكم فى الشديد القوى
فسبتونى
حتى الملايكة
ضللوا بالاجنحة علي وشى
رجعوا ونسيونى
فما ترجعوش لأوراقى
لأن حبرها اتبدد
محتاج لجنة واسعة تتحدد
أقوم ادخلها ، وف إيدى حصانى
أضحك ، ويصهل
اصهل ، ويضحك
تنفك عقدة لسانى
واشتم البيغانات
وارتمى من سكات
اتحسس نعومة الطحالب
واحفظ فى آية " الموات " !

(٣)

ما تكموش الريح
ولا تضمدوا الجريح
سيبوا كل شئ علي حاله
فوتوا سرب سمان
يروح ، وما تسألوش
تاني عن أحواله
هو الفتى المقتول بلا فتوى
ودى صورته
متدبسة ، ومختومة
يا أرضنا يا كتومة
واصلى النهجان
يجري أيه لما ينهزم إنسان
يسقط علي الأسفلت
لما تدق ساعة الجامعة
واحدة ونص ؟
يجري أيه أن أوراق النخيل
.. مش راضى ببص
ولا الجذع بينحنى خجول

مش هو برضه " الكلام " التمام
اللى بحروف دهب سبى العقول
مش هو برضه اللى أوصد الأبواب
وعوَّده الخمول
مش عادته ينخ جمل الحمل
لكنه هينخ زي الليل والنهار
ساعة الدوران
مش عفى الرمان
ولا غبى الإنسان
ماحد يملك حريره إلا الميت
.. والجنين
قبل ما يلفه القمط
فعدوا على المشهد .. من سكات
الأبيض الشاهق
والأسود البهتان
بيتزواجوا ويتناسلوا
ويتضاربوا ويتخاصموا
ولما يتصالحوا
يكون .. فات الألوان !

(٤)

الورد زهره
والياسمين بعت شذاه
وصل الطريق لمنتهاه
صياد ، وخارج بمركبته
فارد شباكه بلون المسا
لمح القمر مقتول
لمحه فى قلب البحر
ميل .. لمسه بالصواب
يا قلبى .. واخذ ع الفواجع
لأ .. ما تصيرشى
سرب السمك ماشى إلى مصيره
عيون الغزل راح تأسره
وتشدّه للخشب اللى بله الندي
.. والموج
..
إيد " الخليفة " رنت عود
خليفة بعمامة حرير
وخيط نازل ، واكل حتة م الجبهة

الورد زهرة من غير ولا ندهة

المية مالحة

والاثنين : هيل .. هيل .. هوبا

دبدب بقدمك ، حبة ورا حبة

العضم وحده اللي باقي

هيكل من الفوسفور

(العلم نور)

فاتنوا يا اصحابي الحزانى

أكيد عليكم الدور

(٥)

بجعة

بريش أبيض

وبجعة

بسلك فضة

وبجعة

بتبكي فى بركتها

تحت السما الزرقة

بتشكى وحدتها

وبتكره الصياد

بجعة

بترقص فى نشوة
وأنا بانتحب وحدى
لو خدتها أودتى
هتزهق م الكبت والصمت
آه .. لو تمام بمنقارها .. علي كتفى
لو تستخبي فى مغارة الألفاظ
لكنت عشت مستريح
بجعة ، تحب النور الصريح
ريحة النعناع .. والشيخ
بجعة ، بترفع ساق والتانية ما ترفعهاش
فى عينها ألم ضنين ، اتحاش
أنا قصاها ضعيف
والبراح البراح مخيف
تلت ريشات ..
وقلبها العفيف صدى
بجعة اختارتنى
واخترتها ..
بسلك فضة !

خدوش

خدش روى زجاج المرايا
وصبح برتقانى اللون
بضيه يرميني
فادخل كل البنات اللى حبيتهم
فى القلب ، جوايا
دي مش نهاية الوجود
ولا هى كمان البداية
لكنها دموع الاتكسار
لفارس بلا يقين
إنسان نساء ، كسره الحنين
ورذاذ المطر
ضروع البقر
اللى بتعطي حليب
ومنين اجيب وتر للربابة
أو صابع مش مرتجف ؟!

..

الشك فى بذرة الكون
وف مسامير الصلب الحديد
الزمن هدى
" فعال لما يريد "
هل تنتظر مزيد
.. من الكلام أو ثرثرة دموع
إيد الشهيد اترفعت م الرمال
وكان خلفه تبة
بتشهق للرصاص اللى عصف
وارتجف
فى المنتصف
منتصف الصدر والأعوام !
خدوش
بتنوش الحكاوي القديمة
كل الخلق بتتطوح
فى دروب المدينة
وجواهرهم سكية
متسلسلين من عهد أموى .. لعباسى
تقيلة أنفاسى

وأفراسى
بتتوغل فى عشب أخضر مرمى

..

فى زوايا الألم الصموت
أيه عمله بواكى البنكوت
لشعر أبيض
وسواد فاحم بطعم الليل
اتسجن

فى كشف شعرا
بيخافوا الرحيل
بارادتهم .. او بقصورهم الذاتى
خدونى فى حضنهم إخوانى
كملوا الشهقة
فمررت حبات اللمون
يا كون

يا أضيق من حلمنا القديم
إنت غريب .. وضحكك مش دفا
ولا كلامك حكيم
كل المراكب بتوصل للشطوط

فى نفس مواعيدها
والبنّت دي عارفها
.. أنا كنت مواعيدها
فى أول مرة لبست فستان إرجوانى
وف تانى مرة ..
.. كمّلت غنوة علي لسانى
وف تالت
شاورت لى من بعيد ، واختفت
مىة البحر صفت
دققت فيها
كان وجهى بيشلب دم
خدوش من الزمان
وصاحبى زى
الخنجر فى ضهره ، ولم يهتم
..
وجرحى كل ما أحكه
يتسرب مواويل عتيقة
مش قادر احصى ثوانى الدقيقة
سايب الأوجاع تفترسنى

والجوه اللى بلا معانى

أعرف غنا ويهم

أفكرها الأسامى

..

فى كل خطوة اتحسس دروبى

وأحاول أخفى الخدوش

..

ليه البنات العذارى

من جوه جرحى

.. للآن لسه ما طلوش؟؟

* * *

الدروب

هى الدروب العتمة
وخذتنى م الطفولة
اشتالنى هواها الفضى
ببسمه معقولة
ولما لفحنى هوا البنات
غزتنى الرجولة
حس غريب احتوانى
كانت بصفيرة سودة
وغمزتين
دون ما تسألنى : على فين ؟
هى اللى مشتنى فى الشوارع الضى
.. والجنابين
مسافة من الدهشة
والبكا متحاش ، وخاين
باستعيده ، وأنا باشد انفاس

" المعسلة " اللي بتكح فى صدرى

يومها قمت بدرى

وارتميت فى فدان من حلم

شقيت هدوم الشجر

وخذ ضله علامة ودليل

ما كانش الليل

.. يخوفنى

ماكنش شئ بيجرح فؤادى الطري

كان الكلام مرمرى

وشعرها ديل حصان

إيدى بعيدة عن إيدها

لكنى حاسس بالدفأ

.. والسخونة

بتطل م البلگونه

حاسس بها وهى تلتفت

تبص ، وترجع

بتلعب " الأولة "

والطيارات الورق بتتمرجح مع النسيم

ماكنش حد لنيم

من صحابى ، لأنهم زى
واقفين فى شباك الاشتياق
أبريق وضاق
ع المية ، اللى جواه
وما كانش حد بينطق آه
إلاف أودة بجدران أربعة
دنيا واسعة
إنما الحوارى ضيقة
والحيطان عليها كل الحروف والأسامى
كل كلامنا ققط مغمضة
طالعة من الدم الحنين
.. والشتا

..

هى الدروب
ولبلابة شاقة الخلا ، ومنبئة
أيه يا قلبي
ياللى صبرت كثير ع الهزائم
هزيم الرعد
هو اللى دخلنى فى الدولاب القديم

هزيم ، بيزوم
ويجرح السما
جرح غويط ، ومخيف

علي سطوح السور الحديد نداوه الصيف

..

أقوم من نومي قبل الصباح
اشخبط بالطباشير
أسمين علي الباب
أسم لحبيبتى اللي عارف اسمها الأولانى
واسم تانى
للواد النحيف ، الشريد ، الضعيف
احكم الكوفية علي زورى

..

ألف ، وألف ، مش قادر احفظ دوري
اخرج عن النص
بعين نص نص
تبص
علي المرايا اللي تعكس الوجوه

دروب ما حدث فيها يتوه
لكنها الضحكات تشمل الجسد
.. والروح ..

..
الماشية بتتحرك
بتيجي ، وتروح
الكحة تشق الصدر
وتحجب الاشتياق

..
أبريق ، وضاق
علي التمر هندي جواه

..
يا نيل ، يا صافى ، مين علمك
تقول الآه ..
ومين جراك من السوبات
وعطبرة والغزال ، لحد المصب
مين علمك تحب الطيور ، والحب
إنت بتتلوي ، وتعرج فى الغيطان والفصول
لكنما بتتحب

دروب تخفى عن الخلق أوجاعها
حافى القدم
ودقة الساعة ، لسانى باسمعها
أصعد السموات
بهيكل خفيف خفيف
أتنين باحب سيرتهم
الصديق الوفي ، والصبح النضيف
واتنين باخاف منهم
مرارة الحنضل ، وردة الرغيف
لكنما الخريف
يضحك عليّ فى روائه الرمادي
مين ابتدا الخصام
من تانى
.. بالقيود تصلصل صليل
ده احنا من صلصال
ودمنا مية علي أساطير
..
يا هلترى فيه حد فيكوا
نبتت جناحاته ، وقادر يطير

إن كان
فأنا بانتظر ، ياخذنى وياه
هاضحك للشّتا الوردي
ومش هانطق الآه
وحق النبق
ومين سكرّه ، وحلاه
وخباه
تحت باط الفروع الخضرة
عرفه المكامن ، ووراه
البشر الحزانى
والشوارع اللى بتعشق الحياة
نفس عشق العصافير الطليقة
مش المحبوسة فى البلكنات
الفجر طل ، ومن سكات
مارضاش يغنى بمفرده
شاف النجوم بيلمعوا
ويبعدوا
..
أنا قرّبت زي زمان

وقطفت نجمة م السما الزرقة
نجمة اتوهجت ليها إيدي
وسكنت خواطري
بكمنجة ، وبريق

..

دروب توسع ، ومش بتضيق
رجعت تاخذني
وتنشر في عقلي الحريق
إزاي أطارد نعمة مش عارفاني
واعدي م المضيق
كباية الشاي علي اثنين
ولاً علي خمسة
جسدي اتحول شظايا من لمسة
جوايا همسة
محوّشها لأيام السعادة
اللي بتتسحب في القلوب
مسكينة العيون
اللي لدلوقتي مخاصمة الدروب

* * *

البقية فى حياتى

هزمتنى قلة الحيلة
والمعانى البخيلة
الورود اللى تطوي حيرتها فى اللون
هزمتنى ، وهزنتى بالجنون
لما كنت واقف
على عتبة المُحال
ولد صغير
متعلق على حافة الهلال
ما أجمله : حضن البنت الحلال
ما أبعده : الشعر فى قلب عجوز
فتحت باب البيت
وطليت
فى وجه الصباح الصبوح
قعدت ع القهوة
يومى (حليب) ونادى

باحصى أيام ، وأصُر ليالى
وانقى من حصاد العُمر
السنين اللى شهورها جميلة

* *

هزمتنى قلة الحيلة
فرحت أبيع الباقي من عمرى
أبيعه لأي شارى
فما التقيت
عدت لتحت جلدى
ابص لتيار الدم
وكراته البيضاء والحمرا
مفیش أي أثر
.. لدخان أو خمرة
فيه شحوب وخرايط لوطن أعرفه
وحى قديم كنت أسكنه
أرابيسك
قبة مشغولة بشبابيك إزاز
ألوان بتبهجنى

مطر .. رذاذ
حتى قصايدى العزاز
كانوا جوه أوراقى حبر ناشف
أدي الكلام كاشف
.. كل أنينى
ملح سنينى
شهقة الميلاد
الأولادى
توبى فى أسنانى

باحاول أجري أجري
ومش قادر !

* *

استوقفنى كهل ، وقف فى سكتى
شاور
بسبحة ثلاثة وتلاتين حبة
وكومة محبة
وحبة من الرمان مفروط

أملأتى الشروط
ودخلنى أودة عتمة
جدرانها من الصراخ القديم
العتبة وحدها من أزهى نجيلة
هزمتنى قلة الحيلة
خبطت بقبضتى الجدران
.. والسقف
لمحت عزمى باصص لي
فى عروق الكف
أنا راسى لف
فشطرنى سياف السكات
أصحى وابات
علي عصافير بتنقر فى البيادر
القطر بينفخ غبار
بيشق الضباب ، وبيعافر
الكرسى خشب
فوق رأسى بيادات العساكر
وشجر التوت
بيجري بضمهه ، ويسافر
يا ما أبعد السكة الطويلة

فى كشف عيلة
كان ترتيب أسمى فى الآخر
ورثت
كومة كتب ، وكومة تراب
تدخل البهجه من السطور
تخرج الأحران من الباب
ما أصعب وداع الأحباب
يا صبح يا كذاب
فى كل تأخير ه خير
فى كل تبكير
شر مستطير
أعد النجوم ، والبيوت ، والعلل
واقفة تشاور لي
الحبيبة فى أبهى الحلل
لكنما ، منعنى الخجل
حطيب براسى
.. على كتف أسمى اللى مشروخ بالغياب
صرخت بعزم مابى من ألم
طار اليمام

وحطت سبع عصافير ، تاتى
علي بابى ، بريش أبيض
بياض قلب طفل رضيع
حسيت بألمى واحدة واحدة ، يضيع
وبجسدي ينحشر فى قبر
.. بديع

للصدى ترجيع
والشعر بستان يدخله الجميع
يدخلوه بالرجل اليمين
من غير ما يؤدوا اليمين
يدخلوا .. ويخرجوا
يسافروا .. يرجعوا
فى بحور : فاعلن .. فعلن
فاعلن .. مستفعلن

أنين ، حنين ،
غيطان من قمح ، وشعير

* *

يا قليل الحيلة
يا أسير المعنى الضيقة
أفتح الكراسية من جديد
واسكب عليها من حبل الوريد

دم طازة
حروف متعاوذة
بريق المأظة

* *

البقاء لله
والبقية ف حياتى !

١٩٩٨/١١/٤

الداء

دبى يا رجلى دبى
حتى لو كات الأرض بعيدة
عن الكعب والمشط
دبى ، ع الحجر المرمى
دانت وخذانى ع الصمت
وكمالة البخت
إن الفضا متلون برصاصى
والطلقة ف صدرى
أما الحربة ، فراشقة فى ضهرى
أنزف من قهرى
والدم يلون أيامي
من غير ما أتأمل صورتي
باقرا فى الكشف أسامي
صحاب : ماتوا ، أو صحبوا
أو دفنوا أولادهم فى الصحرا
مقابل حفنه أوراق خضره

لبنى آدم شعره مجعد
كل ما تأمل فى الصورة
ألقى وطنى ببعد
وأنا باتدحرج
واعود للصف ألقاه ناقص
أطوي الصفحة دي بالذات
أنا مش ناقص
أحط هموم علي حزنى
يصرخ دمي فى وريدي
اخنق بإيديه الصرخة
وادب
علمنى صاحبي المأسور
إنى اضحك علي شايل الكرياج
واعاود الحب
الحب اللي غريب
ومقطع توبه القطنى
قطر الساعة ستة الصبح
خد دخاته وفاتنى
وآدينى واقف لسه علي رصيفه

النيل بيدمع ، والزرع بيدبل
لما بيعانق ريفه
والإنذار أحمر فى ورقته
لسه جوه مظاريفه !

* *

دبى يا رجلى
أو ما تدبش
- شيش بيش -
إنت يا طيورى البيضة الجناحات
من خمسة وعشرين عام .. ليه ما تجيش
فاكر أيا م الجيش
العيش الناشف
والكاكى : ستره على أكتافى
لو كنت اندورت ، وبصيت للصول
لجل أورنيك التذنيب
كنت قدرت
أحاكى ليلى الباكي
وغنوة بتفجر حجر الجرانيت

لو قلت يا ريت
فأنا متعلق من عرقوبي
.. فى الزمن الماضي
طائل علي الزمن الفاضى

اللي بلا أشعار
أو بنت شقيه .. تزغلل عينى
بمرايا فضة
- العيش مليان بالردة -
فازاي
تمطر ، من غير ما تبل هدومي

* *

كنت باحب الأيام دي
وباخدها جوايا
واقول - بالقلب المشروخ - عودي
لكني بالكاد
صالب عودي
وإيديه ملسوعة بالجمر

وكفوفي نار
مش خمرة ، ونبق ، وتمر
(لله الأمر
من قبل وبعد)
الأمر النافذ
وميعاد الموت
إياك ، يا سكوت تعاشرنى تانى
أو تسكن علي طرف لساني
إياك تدخل حنجرتى
وترعش إيدي
ياه
يا أحزان روي بعيد
إياكي تزيد
الغنوة مرمية ع الأسفلت
وأنا مرمي
علي سرير تعبى ، وأمراضى
* *

دبي

بعزم ما فيكي
أنا مش أقوي من الأرض
ولا كنت ف يوم
اصعب م الزمن المارد
(إزيك يا أجمل ما في الملكوت
هل لسه شقافة
وعيونك تفتن عشاقك
هل لسه بتفوتى
تبد ري زهر البساتين
وتموتى

* *

أنا عارف إني الخسران
وأنتك كسبانة
النار الصهد .. والدخانه

* *

صوابي علي شكل قلمي الجاف
مش قادر إنه يكون وصاف
فلذلك

هاروح اخطط بضوافري ع الأوراق

الحفرة دي مصير كل العشاق

ومصيري

الصدى : مفتون بالكحل فى مراوده

فدبى

دبيب

الداء ده ملوش أي طبيب

الداء يعدي كل سليم

لكنه مش ممكن مرة يطيب !

* * *

١٩٩٨/١٢/١٠

سهاري وصوابعها الفتيل

(إلى بنت الشاطئ)

الأرض دي دمياط
المبتدا .. الشطر الخصيب
والمنتهى مش سكات
شباك بيفتح ضرفتينه
ع الكلام الفصيح
بنت تقاوم الريح
بنت لكين زان .. فى أفكارها
لسه بتمشى فى الحوارى الضيقة
بتفر دفترها
تقرا " ياسين "
علي جسدها النحيل
قماش من التيل
وجوه الصدر .. قلب نبيل
إيدها سهاري .. صوابعها الفتيل
بنت تحب البلد

وبتعثق دق شواكيش الأسطوات
ما الأرض دي دمياط
وهي بنت البحر ، بنت النهر
والشط اللي لساه يئن أنين
شط بيطرده الفرنجة من منات السنين
تقرا ، ويغلبها الحنين
لفرسان نوروا السكك الكنيبة
.. بالحروف

ما فيش لزوم للخوف
وفيه مكان للمعرفة
أصل العشش الخوص
جواها .. تلقى البنات مكتتفة
والخرافة .. بتدوس البدن والنفوس
..

تفتح القرآن
ينور القلب ، ويا العينين
ياه .. من سنين
الأب علمها الحروف
تتلضم ، وتصبح معاني

لكنها واقفة تصد الرياح العفي
تعاني
وتقول لصاحباتها
إمتى تتفك صرة الدقايق والثواني
ترفع بين كفوفها
.. أوراق الجدود .. من تانى
السطر ده : تايهة أوصافه
زي ما تكون العبارة
مغارة من ألماظ ومرجان وياقوت
لو تفتتح الطاقة دي تنور لنا
.. كل البيوت
وما يخفش الحي من الحياة
ولا يهاب الموت
يا حلم يا مكبوت
مين بس فرض عليك السكوت
..

أنا بنت
آه بنت الشط ده بالذات
لكني بنت اللغة ، والجدور البعيدة

فى الصدر ألم ، ومراثى ، وتنهيدة
ليه فى بلدنا : البنات يحملوا خلف الشيش ؟
وليه الشمس كل ربيع ما بتجيش
تعلأ علي جراحها ، بتسأل ، وما تخبيش
فى الخلا : بتحوم الخفافيش
من أمتى أطفال الشوارع ، ما بتغنيش
هي الإجابة فى أوراقي
هو الظلام راح تطرده
تجيب الكلام اللي يدي المية للسواقى
فى (القاهرة)
تحكم علي جسمها العباية
فى نص الليل بتقرا السور : آية آية
وزي البرق ، تفهم بقية الحكاية
إحنا نون النسوة
ونص الكون
أقرب الناس للحكمة .. أو .. الجنون
أبعد الخلق عن الكذب اللي بألف لون "
لكنما شمسنا بتغيب
ليه الجدود قالوا (عيب)

علي الشئ اللي ينور البصيرة
المحبرة مغموس فيها صواب العيلة
تطويها حيرة
تقوم في الفجر ، مع الآذان بتفتش
.. الأوراق من جديد
تعد للمصب
تمد إيدها للمية المالحة ، تدوقها
تحس بنشفان ريقها
لأن الكلمة فقدت بريقها
..

كل الخلق نامت إلهها
بتطل م الشباك
علي الندي فوق السور الحديد
وتكتب من جديد
الموت سكات
والكلام سطوة وجاه
الكلام الصح سطوة وجاه
الكلام الصح عهد البشر وإلهه
للعلما .. اللي هما مفتاح الحياة

تمد أيدها علي شعرها اللي شاب
تبص جواها علي القلب
اللى من قهر الصعاب .. داب
وتعد أوراق الكتاب
تلقاه ينقص كل يوم عن التانى
والخلق تنسى الرجا ، والأمانى
فترحل للشط البعيد
يمكن هناك تلقى
نفس العيد
اللى عاشت بتستناه
عاشت سنين نستتظره
.. بدون ما تنطق آه
..

ودمياط
مش بتبكي علي بنتها
لكنها واقفة وتستنى أحفادها
لهم نفس سمتها .. وعنادها
حبهم للمعرفة اللي دخلت رحابها
.. من أبوابها

لهم نفس ارتعاشة الإيد
والعشق لدقة الشواكيش م الصبح
صرخة لوح الخشب
وهمسة للسراق بتنهد
وإيمان بفجر جديد
يتأخر عقود
لكنما حتماً جاي
ومعاه أغاني الناي
ناي بيضحك
ما يعرفش العياط
لأن الأرض دي دميّاط

* * *

١٩٩٨/١٢/٦

كان الوجد لبلاّب

(إلى وجيه عبد الهادي)

(١)

أنا كنت ناوي أغنى غنوة للأفول
وللخريف يهرب في تعريشة الفصول
ويصفر أوراق الشجر الخجول
بدأت أدون المشاعر حروف
ناداني من بير السكات خوف
مس قلبي بالارتجاف
وأنا اللي عشت أخاف
من الموت موت
وأشوف في نقرة البيضة
بمنقار كتكوت
بداية السكوت
طويت الورق وغبت في امبارح
آدي الظلام سارح

ففى ملكوت البشر الطيبين
آدي حبل الآتين
لأقف على نفس الحناجر
كان يجري أليه لو الغنا يسافر
يملا أبريقه من النجوع ، والدساكر
كان يجري أليه لو خبطت إيدي على بابيه
فألقاه يبتسم لي
بعد صحابه ما غابوا
يمد إيده يصافحنى
يلف ويا يا على اكعابه
فى حوارى عتباتها مكسورة
بيوتها ..
تطل شبابيكها على نيلك يا منصوره

* * *

(٢)

يا ألف وتلتميت مرحبا
يا لصحبة واللمة
إحنا عددنا قليل
لكن نتدفي بالضممة
حدوته تخرج من كراسة بجلدة ورق
حروف من كهربان ، أو عرق
جدة قاعدة أيدها علي خدها
خدوا منها بكرها
للجيش
لبس كاكبي
وهي لبست هدومها
علي همومها
مين اللي يحكى ويفسر
يخرج لها الزي .. بعدما طال صومها
مين اللي يتحسس الحز ع الرقبة
ويتحسر ؟
ما أصل الخنجر ده بالذات
كان قاصد القلب ، والحكايات

فيه حب من غير نبات ؟
أو حدوته من غير تبات ونبات
نبات أخضر بعروق فيها مية الحياة
اللى عاش ينطق آه
لولاك يا ألم ما كنت شهقت
ما عرفت إني غلظت
.. إلا ما
الدم سال علي معصم الأمة !

* * *

(٣)

كان الوجع لبلاب
والشمس ناي مكسور
حلفت أغني بدون ما أقطع الأوراق
حلفت ، لكن صوتي اتحبس
إتفرق العشاق
مشيوا فرادي
والظلام عسكري بكرباج سوداني
عايزني انطق تاني
حضر ، هانطق وها تحمل البهدة
يا حنين لعل جديد
شنبه بيخضر علي عتبة المرجلة
(فك الحزن) ^(١) معايا
لأنه مجدول من صلب مش كتان
صدر البيان
في أول الصفحة
مش قادر اصحي
مش قادر إني أنام
ولا أحلم بطيراني القديم

يا (بيرم) أدخل فى عباية (النديم)
يا (شاذلي) (١) حود على بيت (وجيه) (٢)
(يوسف يا قط) (٣)
.. سلمك لسا مكمسور
والأودة من غير سقف
كل ما ينقص صف
يكملوه الولاد الجداد
لما الأكم زاد اتبدلت الصورة بناس من لحم ودم
أصغر ما فيهم ضحك
واتفجر الشريان ، لكنه لم يهتم
الموتى فى السكك ، ماشيين جماعات
والراجلين
قاعدين فى نفس قهوتهم
لكنهم بدلوا سكاتهم
بكلام حكيم ورثوه عن الجدة والعمة
أوريني كشف السنين
وشاور لى بالتحديد
إمتى ربنا الرحمن يكشف الغمة ؟!

(٤)

مين اللي قال الحزن عارفنا ؟
الصح إنه هو اللي خلفنا
واحنا ققط عامية
فاتنا نتخبط فى البكا الأول
سافر ، ووياه شهادات الميلاد
فرحنا مدارسنا بدون أوراق
دخلنا نتعلم ، ونتألم ، ونتكلم
وف كل أول شهر ناخذ الشهادات
ما نلاقي أب يمضى ، ولا أم تقرا
كشف النسب مكتوب ..
.. علي ورقة البفرة
ما يصيبش ، ما يهمش
ما دام بلدنا حرة
والدم نقي ، وصافي
مفيش فيه بغض أو خمرة
لكن الغراب اللعين نعق : غاق .. غاق
تبتناع الأشعار
الحبر خاف ، هرب من الأوراق

* * *

(٥)

لما بيدخل نوفمبر
باتحسس أوجاعى
تحت جلدي رماد
من النار اللي ولعناها
القاهره عارفاها
الدلتا مستنية جمر السنين
و (الحسين) سهران يشد مبسم النرجيلة
التوب بلون السما الزرقة
والإسم (ترحيلة)
مين يا فرس اصبها نى داس النجيلة
ودق بحوافره القلب الرهيف
أنا شفت (ابن الريف) (٥)
غرقان على شطوط عدن
وحده اللي دفع التمن
والغربة طوق بيبعد كل ما الموج ينطره
يا خلق مين ينصره
ع الموت
ويرجع بيه لأوطانه

القل والياسمين علي الشباك
والبيت بلا سكان
ده حلم ولا بداية الجنان
أنا مش مكشوف عني الحجاب
واقف اخبط بقبضتيني الباب
ما يرد علي صوت ولا صدي
عجوز بص لي ، وهمس لي : كله قضا
ملت علي السكة وحيد
علي وشي ابتسامة رضا
أيه اللي عمله الغضب
.. والعنفوان غير قتلى من غير شواهد
يا ليل وخليك شاهد
إنت عدوي ، لكنك الأقوي
كل ما ترحل بعيد
بتعود علي سهوة
نلقاك في فنان شاي
في مرارة القهوة
الموت مهوش مشكلة
الرعب هو الحياة

إزاي نكون عايشين
وكل أشعارنا " آه "
قصصنا من غير سلطان وجاه
كل اللي بص وراه
صبح حجر جلمود
وأنا أول التماثيل

* * *

-
- (١) فك الحزن . عنوان مجموعة قصصية لوجيه عبد الهادي .
(٢) عبد الدايم الشاذلي . شاعر راحل من كفر الشيخ .
(٣) وجيه عبد الهادي . قاص راحل من المنصورة .
(٤) يوسف القط ، قاص طليعي من مواليد بني سويف ، عاش في دمياط ومات بها .
(٥) ابن الريف ، هو الشاعر الرجل زكي عمر . من مواليد كفر الأعرج بالدقهلية . مات بعدن .

زلا

- * العزا .. باب الفتوح
- * الضي المسكين .
- * سجادة الروح .
- * فى القاهرة المملوكية .
- * الأرض : فاس جديد.

العزا .. باب الفتوح

(١)

طوت المدن أوراقها
رحلت فى السراب طوت الكتاب
والدمع فر من العيون
اتفرعت لبلابة
ع الباب .. البعيد
يا صبح .. أمتى العبد ؟
وامتى الضحكة توسع للمدى ؟
طار الحمام
حطام
ما ينام عيون حراس جفاهم الانتظار
النار بتتشب فى الورق
قلبى انحرق
والدم جوه وريدي
مليان بالشياط

(٢)

عين المحب مسهدة
إفرك عنيه .. النوم ما جاش
الجنب نايم ع الفراش
فى الأودة بيطير الفراش
رايح هناك عند اللهب
تبت إيدى المرجفين
اللى يقولوا إن الوطن مات
والعزا : باب الفتوح
الروح دي شاردة
انما لساها رغم الشدة
ساكنة فى الجسد

(٣)

فى المنعطف
أنا بانخطف
لعسكري على رأسه خوذته
جوه قلبه توتة على جسر

.. بيوصل للمسا
ابني الصغير هوده اللي حبا
يا مرحبا
بالسنة طالعة منبنة
وضحكة بتخايل شعاع الشمي
وتزيح ع الأريل كتير م الأغربة
قد أمي إبريق ميتة
.. من نيل زلال
لو كان بيا الطفل حرام
فالدع منتاح الحلال !

(٤)

الفكرة راحت
والدماغ جواها سكرة
إكشفوا عني غطايا
مدوا جسمي
.. في حفرة من قلق
لسه بيغسلنى العرق
يا فجر يا الله اتفلق

وريني لون فرع الزيتون
لما اخضراره يملئ أفقى
.. بالحريق .. وبالشجون
فرد وحيد ، واحد ، موحد بالإله
يا آه .. أنين الروح
ده طائر فى جدار " بنى حسن "
جدار ومرسوم بألوانه الزاهية ..
.. نسوة بيضحكوا
الضحكة لسة ملعلعة
النار فى قلبي مولعة

أنا ضد .. أم إني مع
أنا واحد اتقسمت ملامحه
فى البوادي ، والصحاري الأربعة
أن مع ..
جسد بيتخلص من قيود كل الحروف
ألف ولام .. ميم وعين
يا ربنا إنت المعين
أوهب ولادي شئ م الأمل
ومن الحنين !

(٥)

بيخطر فوا
وهما ماشيين فى السكك
العملة مسكوكة بصورة سلطانين
واحد بتاج
والثاني له ناب عاج
لكنى ، باتحنى بالرأس فى وجه النور
وإدور
أصعد سماوات من ضيا
هل يستوي الشوف والعما
هل يستوي القرع اللي دبلان
.. بالنخيل اللي نما ؟

* * *

فيه فى مقابل الشباك جدار
 جدار من الكذب
 اللي مالي الروح شظايا م الهشيم
 أنا .. الإزاز جري فى الشرايين
 هل من نديم ؟
 كباية الشاي باللبن
 سندوتش الفول
 .. لصاحبي أسمه حسن
 وعلامته حسنة سمرة
 علي دقنه اللي نابت بالزغب
 فى مجري من ماء انحسر - هنا - الزمن
 بانت كتير من موميאות
 جوه صناديق من صخور الجرانيت
 لو قلت إني منهم .. فأنا كدوب
 ده أنا يا دوب
 باتهجي فى اوائل الحروف
 خوف مستحيل ، وعسكري بدون شرايط

أو عنين
هو يشوفني ، وباجهله
لكني ماشى ف سكتى
باعد أسلاك الطريق ، واتلمس النار بالنهار
فيه فى مقابل الشباك .. جدار !

* * *

(٧)

بنت غريبة
بتدخل " النص " بنص كم
دي بنت فوارة ، تعيد الدم
تهيج فى الورد
بنت غريبة .. والولد
جوه إزازة محكمة
فى المحكمة
رفعت إيديها حلفت أن الاتهام
صحيح ، صحيح

بنت تحب الريح ودورات الفصول

لساها تتعري

برغم الشمس قاربت م الأفول

..

فيما عيونى المجهدة

بصى فى صفحة نيل

وتانى دققى

أنا اللي مقتول

ولا أنا اللي حي دايس بقدمي

علي أجساد فتية للمغول ؟

١٩٩٩/٥/١٥ م

الضى المسكين

(١)

فتح الضى قلبى
وغسلنى بالاخضرار
فاتنى على أبواب الحياة
بالاعتراض ، والأسئلة
ياضى يا مسكين
إذا ما لليل زحف
هتلاقى حتفك
ترتعد، وقت الغروب
لكنما
إنت تغنى غنوتك
مع كل رنة عود
إنت نروح
كل العصافير تنتظر
إنك تعود

وحدى اللى ضحى

بدون رجوع !

(٢)

إذا إنت خشيت قبرك الضيق

إياك تبتئس

إضحك فى وجه الدود

وإنطق كلمتين

انهش فى جسدي

إنما أنت الضئيل

التافه ، اللى بدون علام ، ولا تجربة

زي ما جيت هتروح بدون ..

.. خطينة واحدة

رغم أنك ندل .. دون

أنا اللى لى المجد والتاريخ

برغم التيل محاوطني ، وهمس مشيعين

يا دود لعين

زي ماجيت هتعود تراب

وأنا اللي لي ولاد ..
وتاريخ .. وانهزام !

(٣)

اتنين ما احيش شكلهم
خطو الخرّس
ودق كعب صفوف حرس !
اتنين وجودهم يفترسني بالصداع
بوصة ف خريطة أرضى
بتروح لليهود
وزحف دود الأرض
فى جسد القتيل

..

سيان مريض أو كان شهيد
هنطارد الخرّس الرمادي بالكلام
ونزيح موات الجسم
.. بالروح تنطلق فى الكون
تكون

شجرة لمون
وزقزقة عصفور يهفهف
بجناحين !

(٤)

الحر أنا .. أم السجين ؟
فى الساعة بتدور العقارب م الشمال
ريح الصبا هي اللي فى الليل هفهفت
قناديل فى عز الليل
شفتها فجأة انطففت
مفئش فى صدري فرح
ولا عدت حزين
جوه الخلايا ردم من الملاجئ
اللي جواها أطفال غلبانين
(يونيو) عاطيني ضهره ، ومخبى الرموز
فى صدره طلقه من رصاص
وطلقتين من ذكريات !

سيول من البشر
اللي ماشيين فى الحياة
رغم العيون متفنجلة
ما فى شوف
ده لأنهم فى الكون ضيوف
عشر سنين حبو
وعشرة حب
خمسين م الأنين
ورغم ده الدنيا حلوة مزهزة
ما دام فى كل شارع تلتقي عيون (مها)
وشاب ماسك ورد جوري
وجيبه فيه منديل حرير

..

إنسان بيشنال ذنب آدم
إنما هو الجدير
بفدان بؤس
وقيراط من سعادة منتهاه

رقم فى دفتر الميلاد
وتاني فى سجل الوفاة !

(٦)

فى قلبي نغز من ألم
ضغط ، وبرشام
كشف انتقام
اياك بنصحي أو تنام
خليك علي حافة الوجود
عضم ، عضل ، فكر ، ودم
النبض مليان بالزهور
ومفیش مكان
لضيف اسمه الندم !

١٩٩٩/٥/١٥

سجادة الروح

جرنان فى إيدي
مليان بالحوادث مفجعات
جرنان
سطور من التعازي وفيه مغازي ، واساطيل
بتدك أفواها حصون
" جنرال " بيركب ع المنون
(ليالي العمر معدودة)
لكين مسن عدها
سجادة الروح مين مدها
تمشى عليها صفوف
فاتحين
الفاحة للراجلين
وللجايين
ولكل من جه أسمه
.. فى كشف الثدييات

والمتربعين ع الأنظمة

والحكومات

لو كنت بتموت ع المناصب والكراسي

وأشكال الياقوت

فاقطع خيوط العنكبوت

حطه علي الصدر شعار

مفیش فرار

.. من الحياة

مفیش هروب من الموات

(خيام) جديد فارد فى خيمته

عشرات أسئلة

ودن خمر ، وعش دبابير

.. لو تغير علي المدنية

أولادها يسكنهم فزع

هناك باشوف انهار تفيض

زرع اتقلع

..

ولا زال عيون الناس

تغنى للحبيبة والوطن

تغني بالنبض
تقول بالحنجرة
مفبش فرار م اللي جري
آدي تراب الروح : شوارع القاهرة
ميادين وفيها تماثيل
واقف صاحبها
بعد ما اختاروا الرحيل
مسافة بين بوصة واحدة ، والـف ميل
فافتح القلب للضيا
واغسله بالاخضرار !

١٩٩٩/٥/١٦

فى القهرة المملوكية

(١)

مملوك

مزرکش صدره بالخيط الحرير

متصور أنه بالمنظرة ، وهزة سيفه

هيبقى حر

واقف على الإفريز

وجنبه حصانه النبيل

مترصع جبينه بالزمرد ، والصهيل

والفارس مالى قلبه بالوجع

نايم تحت قلعة سيده

كل الناس -افكرهم - عبيده

رغم بشرته البيضاء

ولحيته الحمرا

مسطول ، بالهيلمان والخمرا

..

البيوت مقفولة ع اللي فيها
لا فيها لا اخفيها
هيروح أي جبهه
رغم وجاهته
وجوه حواليه ملانة بحسد
وسادته لظي وشوك
مملوك !

(٢)

ليه الفلاحين الرعاع
كانت جلا لبيهم زرق
مع أن كل شئ حواليههم اخضرار
ليه مش لاقين الفطار
غير عود سريس وجعضيض
الوجه غريب وبغيض
لا يعرف ينكت ولا يضحك في كمة
شایل السيف م الصبا
وعلي رأسه همه
ع الغفر تتدفع فردة

دخل العيد ده

ما حدش عمل كعك ولا فطير
فى الجبانات الرزق ، وأكل الطير
كل فرس سريع بيطير
يرتفع فى الفضاء ، ويدوب
وفجأة ينزل علي وجه الحي بغروب
الشمس ساكنة زي الناس
والقلب
مفيهش أي حماس !

(٣)

فى القاهرة المملوكية
المشربيات لسه مقفولة
القهوة تركية
سادة لناس مش سادة
حط دماغه ع الوسادة
ما نام
طار اليمام ، وعشش فى الشجر الحر
شجر بيخضر

رغم ضيقه م الوجوه الغريبة
شجر بيتلفت
ويتحسس فى النهر : الميه المريبة !

(٤)

أنفاس النرجيلة
بتملا المكان
نفس طالع من الصدر
والنفس مكسورة
لامعة القورة بحبابة من عرق
وفي العيون حيرة صندوق من الأبنوس مغربي
أنا باكره الوجه ده
رغم أنه علي دينى ومذهبي
أكره خيانتة
وكونه خلي الدين عيرة
نرجيلة ، باشد أنفاسها
الحارة دي باعرفها
واحد أنا من حرسها

رابطه راسها
من القلق والدوخة
الآهة جارية من تاريخ قديم
مشروخة

(٥)

مملوك
ومالك مصير الناس
مملوك
بيحصى المال والزمرد .. الأنفاس
لسانه مشبوك بحروف غبية
" - عفارم ولد "
يا كل ويشرب م التكية
من طاقة القصر يدخل شعاع نور
تنطفي الوجوه الكسيفه
وسلاسل المساجين
.. ع الجهات الأربعة بتدور
بتدوس الأحصنة الأسواق

مين اشترى ومين اللي باع ؟
مين الي ضحك ع الغلاية بالفكرة
ومين استقوي بالدرع

..

مملوك ورا مملوك
يتناسوا مع جوارى
م الخرز وبخاري
علي غرزة من البوص : الرعاع حباري
يهزوا دماغهم زعل
بدون اتراس
هما دول حراس
للقلاع البعيدة ، والخانات
الخيانات بلا سقف أو أبواب
يغسلوا وجوههم بالشراب
مع أول ضوء يخلعوا الدنس
تدخل البيوت الونس
والحصر تجني دعوات مكسورة

..

القاهرة مكسورة
وفي الكتب المدهية .. ألقاها منصور !

الأرض : فاس حديد

ولقيتني تايه فى المكان
باقرا الوجوه ، وما تقرنيش
بامشى فى جنازة بدون ألم
لسه الطريق ضلمة ..
... يعتم فى الرموش
الضحكة للأطفال
وأنا .. لي الألم
الأرض فوقها .. شفت موكب للنعوش
وحدي بافتش عن ضيا .. فى الذكريات
فرع العنب .. دبل ، ومات
أخضر ده كان
دلوقتى إصفرت عيدانه
زي ما قلبي عروقه شددت
عرف السكات
والنبض خداع للصحاب

اللي بيتعتروا فى أحزانهم
وفى خيوط الزمان
فارس انا
وبدون حصان
ماشى باجوب " الأطلس " الجغرافي
بسفينة ورق
لو التفت للخلف مرة .. أتشنق
يا خدوني للسياف
يطيح الرأس
ويفضل للجسد : ذراعين ، ورجلين
إنما الأفكار خلاص
رأسى مخاصم جسمى
مصمم : لا مناص

..

احساس يعذبني فى حلمي
فى صحوي
فى جميع الفصول
إزاي تعيش بفكرتين
بروح نبي

وجسم إنسان خلقتة من قلب طين
إنت بعيد عن السمو والسما
أقرب لطيش الخلق
فى لحظة نزق
لو التفت - للمعاجم - اتشنى
خلقي إيدين بترقني
صوت فى الأم بيحثنى
" إياك فى مرة تشترى
أحسن تبیع ! "
باحطم الحكمة وروح الموعظة
أكون بقلب كما الجميع
نصه جروح
والنص لجل اعانق الفجر الصبوح
أنا بالتفت
فجأة وحسيت بالألم
شئ لا يطاق
دمي بحور
لكن حواليا بنات .. انا قلت حور ؟
هزوا دماغهم : آه .. تمام .

أنا جوه صدري خدنتهم

أتلحز بالدم والأفكار

وحزة السيف

إنما .. انهض جدار

.. ..

وشفت جنات من نعيم

بساتين فراولة ، ومانجة

وكنوز من كتب

أول كتاب قريته كان بدون سطور

ثالث ورابع .. ألف

.. دون كلمة ولا جملة وحيدة تدلني

جسمي القديم نفسه

وعقلي بدون كلام ، افكار ، رموز

ضاع هيكلي الشاب

.. فبقيت عجوز

حسيت باني فاضى محتاج معرفة

صرخت

شقيت الهدوم

.. ..

" لأ .. رجعوني للتعب وللهموم " !
الحرور بكوا ثم اختفوا
واتكروا مشيت بساتين
وجاتي صوت ، يرميني - فعلا - بالجنون
" إنت لعين
خد رأسك
أطلع من ممالك مدهشة "
" عود يا ابن آدم
للتعب ، للأرض لعقار التراب " .

.. ..

فرحت تاني بالألم وبالعذاب
بسطور ، عنيا تقراها في كتاب
زي ما أكون
راجع لأرضي من جديد ، وأبتولد
ابكي وارقص م السعادة الباهرة
وارمي الذهب اللي خلبنى

قدمي زلت ، فضحكت
ربطتها بقطن وشاش
قلت في سري :
لأعيش ع الأرض دى
لابلاش

١٩٩٨/٧/٥

صدر للمؤلف



✧ شعر العامية :

الخيول - سبتمبر ١٩٨٢ - إصدارات الرواد - نادي الأدب بدمياط .
ندهة من ريحة زمان - ١٩٩١ - إشراقات أدبية - الهيئة المصرية العامة
للكتاب .
ريحة الحنة - يناير ١٩٩٨ - إصدارات الرواد - فرع دمياط الثقافي .

✧ الراويات :

رجال وشظايا - أدب أكتوبر ١٩٩٠ - الهيئة المصرية العامة للكتاب .

✧ الدراسات والبحوث :

الحكيم وحمارة - سلسلة (عين صفر) - الهيئة العامة لقصور الثقافية -
يوليو ١٩٩٩ م .



الهيئة العامة لقصور الثقافة
إقليم شرق الدلتا الثقافي

رقم الإيداع بدار الكتب
٢٠٠٠/٤٥٩٣

الترقيم الدولي I.S.B.N.
977-324-041-X

دار الإسلام للطباعة والنشر
ت : ٥٥٠/٣٥٠٤٥٣